

卷十四

書名 文潞公文集四十卷 嘉靖五年高陵呂氏刊本
 撰者 宋文彥博撰，明呂柟校
 卷 卷十四
 內容分類 集別集-北宋
 索書號 集部別集-3-28
 編號 D7220100

彩色首頁1

東洋文化研究所漢籍目錄 編號: D7220100

東洋文化研究所漢籍目錄所藏漢籍善本全文影像資料庫 索書號: 集部別集-3-28

漢籍善本全文影像資料庫本文潞公文集四十卷 嘉靖五年高陵呂氏刊本

版權所有: 東京大學 東洋文化研究所

使用上的注意事項

文潞公文集卷第一

古賦

聖駕幸太學賦并序

帝乃備法駕幸于太學詔諸儒博士講論前典親
 聽焉臣獲逢休吉之期恭聞偉盛之事舞蹈不足
 於賦誄誠不能述宣上德褒讚形容姑第樵夫之
 不協擊轅之韻爾詞曰
 受命之四葉皇上御極之三年九有成若六合
 黎庶踏于壽域文教燭乎永天朝無闕政野無

與進一日延食於春明東閣示子蘭陵蕭誠書且曰
名筆也乃知公之行筆類蕭今觀此小楷二軸精勁
有法遠出前輩惟東閣春與之厚不覺泫然泫寧
九年六月二十四日北都善養堂題

文路公文集卷第十三

文路公文集卷第十四

奏議

奏為脩開先殿乞循制度事

臣某昧死謹疏上皇帝陛下臣某誠惶誠懼頓首頓首
首臣聞狂夫之言聖人擇焉臣遭逢聖神敢獻狂瞽
伏惟天地之大德特貸鐵鉞之嚴誅則微臣幸甚臣
伏覩今月十四日詔書太平興國寺僧紹宗緣化脩
蓋外所有太祖神御殿令三司差係官工匠重脩又
云殿重脩於宏麗獲時薦於芬馨有以見陛下奉先
思孝之道高出百王復又盡給國財不煩民力此乃

陛下敦崇儉德勤恤民隱之意也天下幸甚臣切以
載營寶殿嚴奉聖容仰佇靈游是為別廟臣聞清廟
之制理在去華茅屋采椽本貴乎克儉丹楹刻桶乃
譏其崇侈漢書藝文志曰墨家者流出於清廟之官
是以險由此觀之則清廟之尚儉明矣臣伏恐監工
之官未詳詔旨惟務宏麗不稽典故乖清廟尚儉之
文累烈祖恭德之美臣伏望申勅有司凡所營脩循
以典制經始勿亟必順天時臣按月令云孟春無聚
大衆孟夏無起事工又曰孟冬可以造宮室皆不欲
妨農事而違天時也臣竊計今之力役固應不減千

夫雖用官工不妨民事然而聚大衆起大功作事不
時恐乖令典伏望預計徒庸漸儲材用俟良月而興
作亦不口而考成神之格思宜錫純嘏臣又風聞群
僧籍籍道路云云皆謂旣建太祖神御殿庭則本寺
佛殿鐘樓即應次第官脩事之然否雖未審知臣忝
陛下風憲之任為陛下耳目之官苟有所聞理當先
事言之庶幾上達宸聽蓋欲杜其萌漸臣伏覩景祐
三年八月十三日所降聖旨云太平興國寺佛殿鐘
樓并戒壇院舍宇等官中更不脩蓋令開封府及僧
錄司告示僧俗諸色人并許緣化錢取便興脩明命

既行遠邇胥悅皆以謂陛下省不急無益之務軫愛
民節用之心自後已有僧紹宗化錢興脩漸成輪奐
臣伏慮群僧黨扇希望官中兼脩佛殿鍾樓不復化
緣營造伏乞申舉景祐三年先降聖旨其興國寺佛
殿鍾樓任令僧俗緣化興脩所冀絕其希望之心固
其緣化之志况佛寺者非急之務何須速成國帑者
有限之財不可虛費景祐中吳賊未蒙逆節朝廷未
議兵事尚且愛惜用度不脩佛舍今則戍重兵於西
鄙一日之費何啻千金苟旬時之間吳賊之首未即
梟於藁街臣恐事邊之費未免重困於民臣愚以謂
宜節營寺之浮費以濟備邊之急用邊旣實則狂寇
何憂乎不殲芻蕘之言願賜詳擇干冒天聽無任進
退屏營之至

乞令審官院選差沿邊州郡知縣事

康定元年

臣伏見西邊用兵緩急有民間科率應副軍期全藉
州縣官吏必得其人臣欲乞應是陝西河東近邊及
當路縣分自來只差縣令處乞令審官院並選差有
心力幹事京朝官知縣如本院闕官差注即乞外移
合入西川官充兼有流外官見任本縣簿尉處亦乞
令流內銓選差有出身幹事選人充逐縣簿尉所貴

緩急之間易為集事凡有科率必得均平則人戶安居不至勞苦

奏乞主帥便行軍令後奏

康定元年

臣聞穰苴出師首誅莊賈孫武教戰先斬愛姬當事而行未嘗稟命蓋將權不可以不專軍法不可以不峻茲所以攻必克而戰必勝者用法嚴也自古有將權不專軍法不峻而行師必勝者未之聞焉臣切聞去歲以來用兵西鄙或有禁軍小尉臨陣而先退邊壘偏師望敵而不進而統帥之臣即時不行軍令悉以事狀上聞皆令鄰郡置獄取勘下法寺詳案定刑

臣以謂失閫外之制隳軍中之令臨事不斷稟命不威豈曰軍容同大兒戲復恐推劾之際據引枝蔓萌其苟免之心奏報之間淹延時日啓其幸生之路縱不至此亦慢令稽誅無以勵衆乃老師驕兵之弊也臣不知朝廷所用將臣必欲不令專制悉上稟於宸弄乎復不知將臣不能用軍法皆取則於朝廷乎儻朝廷用將而不令專制則臣所謂失閫外之制矣古之遣將也君推轂而命之曰閫以內者寡人制之閫以外者將軍制之此非徒然也蓋委任之成之道不得不重令而輕之故臣所謂失閫外之制矣苟將臣

不能自用軍法則臣所謂墮軍中之令矣人之常情孰不畏死毆億萬之衆冒矢石之衝刑之不嚴何以督戰兵法曰畏我者不畏敵畏敵者不畏我豈非嚴刑故對敵而伍中有一不進者伍長殺伍長不進什長殺之夫以什伍之長尚得專殺而統帥之重不能誅一小校以厲士卒故臣以謂墮軍中之令矣議者或曰今所遇之寇未為大敵所與之師未至深入軍中之法未可專用將校有犯所宜奏裁苟如議者之言臣以為過矣寇非大敵兵未深入尚且狼狽先退逗撻不進儻遇大敵深入而將校有犯必須上聞則穰

苴之戮正費非大敵也止於會軍而後期於戰之動美人非深入也惟以甘戰而衆笑戮其君之寵臣愛姬亦未嘗素稟而先啓終於齊師勝晉吳人入郢孫武穰且皆為名將者委任專而法禁行也以區區霸國猶知任將之道豈巍巍聖朝不及於此且國朝著令凡率軍將校有退去戮此則施於平居無事之日邊州守戍近郡屯聚則用之可矣今吳賊亂常蜂蠆有毒防邊之兵逾數十萬將推不專軍法不峻則何以御之臣伏望陛下出自宸斷稍殺將權凡有偏裨小校臨陣先退望敵不進如此之類罪犯灼然但合

該軍法者不須置獄並許本部統帥對衆便行軍令
訖然後奏聞如此則師旅長成進退從令或守或戰
必有殊功兵者國之大事陛下於廟堂之上與宰輔
大臣計之審矣豈容疎賤輒有輕議然臣承之憲署
職左司聰苟有見聞安可緘默陛下勿以臣之此言
徒習先生之常談耳遂忽而不省臣熟思之任將治
兵之術何莫由斯道也愚者之慮幸賜采擇干冒疏
冕臣無任

乞河東依陝西例點強壯

康定二年

右臣於去年二月初曾上言乞於河東路每三丁點

一丁充強壯緩急為守禦之備自後朝廷差吳遵路
等於河東路點差到強壯共二十四萬三千餘人內
一十三萬三千餘人是主戶九千餘人是客戶是皆
兩丁內點一丁充強壯臣今遍巡歷到諸州軍切見
所點到強壯太多而不精兼頗妨奪農事臣檢會咸
平中曾幹勅點差強壯本路降晉絳茲隰麟府六州
不點差外其點差到強壯四萬四千餘人今來雖添
晉絳茲隰四州點差強壯即比咸平舊幾及三倍况
本路主客人戶共三十一萬三千勘會纔及陝西人
戶之半昨來陝西所點弓手只十萬人以此况之即

河東所點集大多而妨農也臣欲乞依陝西體例每
三丁點一人充強壯猶可得八萬餘人所貴務農作
者不致妨廢習武事者頗得精專如乞臣所奏更不
行鈔點丁口數目而去留之並不搔擾動眾謹具奏
聞伏候勅旨

御前劄子

慶曆四年五月

西界雖累曾差人請和近却不住據延州及環州等
處奏稱賊馬入界作過雖逐度逼逐出界及殺奪到
人馬切慮賊計多姦且以通順為名遷延至秋別圖
天舉今來已入夏月邊上須是蚤作準備仰文某更

切體認今來已是夏月去妨秋不速如邊上有應十
守禦未備事件並仰疾速疚心處置早令了當免致
臨時倉卒悞事此劄子親自收掌不得下司付文某
四月二十四日

荅奏

臣准御前劄子節文西界累差人請和切慮賊計多
姦且以通順為名遷延至秋別圖大舉令臣體認今
來已是夏月去防秋不速如邊上有應于守禦未備
事件並仰疾速疚心處置蚤令了當免致臨時倉卒
却有悞事者臣職在疆場日料賊計雖聞累有歸順

之情深慮必是遷延之計聖慮所及宸筭無遺臣惟知夙夜防虞常若寇至不敢終食之間懈於為備但患才拙不能上副倚寄致煩聖念屢賜戒勵內省不稱伏增惶懼本路沿邊要害城堡樓櫓自去秋以來增脩各得完固以至甲仗戰守之器添補並及分教臣今一依聖旨丁寧更切躬親檢閱守禦之備訓士養馬磨礪兵器及遍指揮諸寨增葺城堡戰守之具及更差官分頭點檢比至防秋委得不悞天事

乞復昭化縣驛程

慶曆六年

去年臣僚上言減廢利州昭化縣驛程臣聞行路之

言皆為不便臣昨親自經由相度誠為不便昭化驛去利州雖近又因東有桔柏津大江之阻西有木瓜原重山之險夏秋二時雨潦留滯行役之人進退無據古來置驛良因於此今既廢驛即經過使命不免裹糧留宿其如過軍稍多即宿食有所闕乏臣欲乞依舊驛支給券料所費甚少所濟則多取進止

乞選差川峽州郡知州

慶曆六年

臣切見祥符中先帝軫念川峽遠民精求循吏以為審官院依資次差移官員多不得人故特頒詔書令馮拯以下各舉川峽知州通判臣切以西川近年以

來生齒繁庶比祥符中數倍全藉長吏安輯稍不得人即煩朝廷西顧臣以為川峽知通若盡須舉差恐難得人所有益梓利三路內邛蜀嘉眉彭漢陵綿果閬遂合劔州興元府十四處戶口繁多屯兵稍衆所有知州知府臣欲乞今後令審官院揀選差官須是歷任內無私罪升朝後有舉主年甲未高者方得差任如任內別敗闕得替日與先次優便差使或別有殊尤治狀灼然可驗即升陟酬獎所貴遠方得人兼舉先朝故事取進止

乞諸州供錢撥充交子務

慶曆六年

益州交子務所川交子歲獲公利甚厚復又民間要藉使用益比之鐵錢便於齎持轉易今因秦州入中糧草兩次支却六十萬貫文交子元有未封樁見錢准備向去給還客人深慮將來一二年間界分欲滿客人將交子赴官却無錢給還有悞請領便至壞却交子之法公私受弊深為不便伏乞朝廷指揮本路轉運司於轄下諸司軍內每月須管共收聚諸般課利錢三五萬貫撥充益州交子務准備給還客人交子錢免致向去壞却舊法官私困弊取進止

乞罷將校舉留

慶曆六年

唐末及五代已來方鎮守臣每有替移或召赴闕其
間徭強武臣多是妄託軍情不時受代因致跋扈國
初懲方鎮之弊盡去此態稟朝廷進退約束無敢違
異臣竊見近日以來沿邊征鎮總兵帥守累有本轄
將州狀舉留者此風不可啓其漸欲乞下諸路轉
運使後更不許諸軍將校使臣等列狀舉留本轄
帥守取進止

乞封示兩制等議汎使事文字

慶曆七年

今月十七日崇政殿蒙賜聖問以北邊汎使忽來恐
有邀求之事深可預防作何回報切以鎮撫四夷宰

相之職以臣之愚短待罪宰司不能有所建明以政
上宸念然臣自聞北虜聚兵雲朔及聞有汎使來告
西行夙夕深思多方迎料但不欲先自張皇預有漏
泄恐非示以閑暇鎮靜之理須虜使之至萬一妄有
邀求或即別懷狡詐則臣之思慮有素可以隨宜裁
制臣今雖與陳執中等同署奏狀上荅聖問示不敢
周悉開陳以俟節日細具面奏兼臣兩日以來
密采外議皆云朝廷百僚只為議汎使事傳聞外方
深佞不便或恐學士以下進日議狀論汎使事乞令
左右封收密示兩府免致漏泄傳布中外謹具奏聞

謹奏

文潞公文集卷第十四

文潞公文集卷第十五

奏議

乞差嘉眉益利屯兵救應洧并監更不差秦

州兵慶曆七年

臣今觀梓州路奏稱洧并監夷人作過事體不小乞
依慶曆四年例於秦鳳路差發兵馬赴本路救應事
臣勘會慶曆四年夏瀘州界夷人作過是時臣任秦
鳳路都部署經略等使准朝旨令臣發禁軍兩指揮
赴瀘州救應臣以秦州去戎瀘四十餘程地遠必赴
救不及枉有拖曳兵甲臣雖知不便當時以朝旨丁